

1 Yohana

Yohana ya sεmε nizhiimε wemu ka ge

Jɔgɔ wu jε Yohana wε?

Tudunmɔɔ Yohana w'a we sεmε we ka. Wee ninumɔ w'a Yohana wo Kile Jozaama pu wo sεmε wu bε ka, ni Yohana wo sεmε nizhiimε we, ni shuun wo we, ni taanri wo we, ni Kashεε Kitabu wu bε.

Yohana ya ta wu mεge ka pii sεmεε taanri we na wε. W'a wuyε pyi na «egilizi nɔhɔle».

Yohana ya ta we sεmε we ka egilizi nigin mεge na wε, ga Azi fiige ki egilizii pu mu w'a wu tun. Yohana bi kapyenεε pyi wu wo cana jii li xɔduun wu ni Efese kulo le, ni li kabanugo kulogoo ki ni. Wee xuu we nijaa wo wu jε Turuki fiige ki ninε ki ni.

We sεmε we kakana jɔnɔ

Wuyε mεge Kile Kafila yεε li jε we sεmε we. Kafila jɔgbɔyɔ taanri wu jε wu ni:

1 N'a daa fεε ya yaa na taha can koro li feni, na pu n'a daa wu taha Yesu na.

2 Yi taan ni yiyε ni, yi da jaari kpεεnge ni.

3 Yi da yiyε kasεri karamɔgɔ-kafinejuu pii na.

Sεmε wu kafila jɔgbɔyɔ

1 Yohana 1:1–2:17 Na jaari kpεεnge ni.

1 Yohana 2:18-29 Jɔgɔ wu jε Kirisa wo pen wu wε?

1 Yohana 3–4 Taanjεεge keree.

1 Yohana 5:1-12 Σεερεε p'a yemu jo Yesu shizhaa na ge.

1 Yohana 5:13-21 Nii sicuumo tadaɲa nakaara baa wogo.

Nii sicuumo nixhobaama jomɔ

¹ Wemu wu ɲe ɲii sicuumo jomɔ pu ge, wee wo keree wèe wa gani yi mu, wemu w'a bye wà yani koɲɔ ki yàa ge. Wèe ya wu jomɔ pu logo, na wu ɲa wù ɲii ki na. Wèe ya wu seeri xuuni, a wù keye be di gbɔn wu na.

² Pee ɲii sicuumo p'a puyɛ shɛ, wèe ya pu ɲa, na pu seeri keree pye. Nii sicuumo nixhobaama pe pu bye Kile taan na puyɛ shɛ wù na ge, pee kaa w'à yu yi mu.

³ W'à lemu ɲa, na lemu logo ge, lee w'à yu yi mu, kɔnhɔ yi be di jé wù wo kariɲeɛge ki ni. Wèe kunni wa jé To Kile ni wu Ja Yesu Kirisa wo kariɲeɛge ki ni.

⁴ Wèe ya kii keree kii ka na ki tun yi mu, kɔnhɔ wù fundanga ki ɲɔ di fa.

Kile ɲe kpɛɛnge; w'à ɲaari kee ni

⁵ W'à jomɔ pemu logo Yesu Kirisa mu di jo yi mu ge, pee pu wa pe na Kile ɲe kpɛɛnge, nibiige yafiin wa wu ni wɛ.

⁶ Wù bu jo na Kile wo kariɲeɛge ki ni wù ɲe, na ta wù ɲaari gbee nibiige ni, kafineyɛ w'à yu, wù ɲe can ɲuɲɔ ni wɛ.

⁷ Ga wù ba ɲaari kpɛɛnge ni, ma na jo ba Kile wa kpɛɛnge ni mɛ wɛ, wee tuun wu ni w'à pye wùye kariɲii, wu Ja Yesu wu shishan pu na wù pye fɛfɛɛ na wù jurumu wu beeri laha wù na.

Wù wù tɔɔgɔ wolo jurumu ni fɛɛfɛɛ

⁸ Wù bu jo na wù ya jurumu pyi wɛ, wuyɛ w'a biinne can jɛ wù funyɔ ni wɛ.

⁹ Ga wù bu yere wù jurumu wu na, Kilɛ ya tii na jɛ jɔmɛɛ fɔɔ. Lee funɲɔ ni wu na wù jurumu wu yafa wù mu. W'à kakuunɔɔ tuuyo yemu bɛɛri pye ge, wu na wù pye fɛɛfɛɛ na yeege kee bɛɛri ni.

¹⁰ Wù bu jo na wù ya ta na jurumu pyi wɛ, w'à Kilɛ pye kafinejo, wu jomɔ pu jɛ wù funɲɔ ni wɛ.

2

Kirisa jɛ wèe tɛgɛvɔɔ

¹ Na nagoo, n'a da kii keree kii ka di ki tun yi mu, kɔnhɔ yi ganha ba jurumu pyi wɛ. Ga wa ba jurumu pye, Tɛgɛvɔɔ wa wù mu wù To Kilɛ wu kabanugo, wee jɛ Yesu Kirisa, wee wemu w'a tii ge.

² W'a pye wèe jurumu wu wo footɔnɔ. Wèe wo wu yɛ bɛ wɛ, ga koɲɔ ke bɛɛri wo jurumu foo w'a tɔ.

W'à yaa na Kilɛ wo jɔmɛhɛɛ ki co

³ Wù bu Kilɛ jɔmɛhɛɛ ki co, wù na li cɛ lee na na w'à wu cɛ.

⁴ Wa ba yu na wee ya Kilɛ cɛ, na ta wu ya wu jɔmɛhɛɛ conɪ wɛ. Weefɔɔ jɛ kafinejo, can jɛ wu funɲɔ ni wɛ.

⁵ Ga wemu w'a wu kafila wu conɪ ge, Kilɛ wo taanɲɛɛge ke nivanɔ ki wa weefɔɔ funɲɔ ni see na. Lee na w'à li cɛni na wèe jɛ wu kariɲɛɛge ki ni.

⁶ Wemu w'a yu na wee jɛ Kirisa wo kariɲɛɛge ki ni ge, weefɔɔ ya yaa w'a ɲaari ba Kirisa yɛ pyaa ya ɲaari wɛ.

Kariɲeege ɲomɛɛ nivonɔ keree

⁷ Na ɲimɛɛ, di wa ta kariɲeege ɲomɛɛfonɔ ka na tun yi mu wɛ, ga ɲomɛɛ nilɛɛ li wa, y'a lemu ta fo yi n'a daa wu ɲɔ kɔnduun wu ni ge. Y'a jomɔ pemu logo xɔ ge, pee pu wa lee ɲomɛɛ nilɛɛ le.

⁸ Ga lee bɛ na, le n'a ka na tun yi mu ge, lee ɲɛ ba ɲomɛɛfonɔ ɲɛ wɛ. Li can w'a ɲa Yesu Kirisa wo torogana li funɲɔ ni, na ɲaa yee bɛ wo torogana li funɲɔ ni. Bani womɔ keree kii nidorogo ki wa, kpɛɛngɛ can wogo ki wa ɲí na xɔ.

⁹ We w'a yu na kpɛɛngɛ ki ni wee ɲɛ, na makɔɲɔ yaha wu ni wu ceboro tɛ ni ge, womɔ ni weefɔɔ ɲɛ sanha.

¹⁰ Wemu ceboro kaa l'a dan wu ni ge, weefɔɔ wu ɲɛ kpɛɛngɛ ki ni. Na wu yaha kpɛɛngɛ ki ni, kaa la shishiin da ga já wu pye wu watii ɲunɔ kyɛɛgi wɛ.

¹¹ Ga we w'a wu ceboro kɔ ge, womɔ ni weefɔɔ ɲɛ, womɔ ni w'a ɲaari. Wu ya wu tashɛge cɛ wɛ, bani womɔ p'a wu pye fyɛn.

Yi ganha bu yi ɲaha le ke koɲɔ ke yaɲmuyɔ ni wɛ

¹² Na nagoo, n'a we sɛmɛ we tunni yi mu, bani yi jurumu w'a yafa yi mu Yesu wo mɛge ki gbɔɔrɔ ni.

¹³ Nɔhɔlɛɛ, n'a we sɛmɛ we tunni yi mu, bani we wu wa wà na ta koɲɔ sanha ɲɔ kɔn wɛ ge, y'a wee cɛ. Lɛvɛɛ, n'a we sɛmɛ we tunni yi mu, bani y'a se ta Shitaanni na. Na nagoo, n'a we sɛmɛ we tun yi mu, bani y'a To Kile cɛ.

¹⁴ Nɔhɔlɛɛ, n'a we sɛmɛ we tun yi mu, bani we wu ɲɛ wà na ta koɲɔ sanha ɲɔ kɔn wɛ ge, y'a wee cɛ. Lɛvɛɛ, n'a we sɛmɛ we tun yi mu, bani yi fanha k'a ɲɛhɛ, Kile jomɔ p'a kori yaha yi funyɔ ni, y'a se ta Shitaanni na.

15 Yi ganha bu koŋɔ yaha ki taan yi mu wɛ, yi ganha bu yi naha le koŋɔ yaaga ke ka nigin bɛ ni wɛ. Koŋɔ bu daan wemu mu, To Kile taanɲɛɛɛɛ ɲɛ weefɔɔ funŋɔ ni bada wɛ.

16 Bani keree kii bɛɛri ki ɲɛ koŋɔ ke ni ge: ceep-uuro lakuuŋɔ ɲidaan keree, ni koŋɔ yaŋmuyɔ wo ɲɛpɛɛn, ni koŋɔ wo mayɛ she keree, lee la shishiin wa foro To Kile ni wɛ fo koŋɔ.

17 Koŋɔ kunni wa doro ni ki ɲidaan wu bɛ, ga we w'a Kile ɲidaan pyi ge, wee na ba gori yaha ɲii na gbee.

W'à wuyɛ kasɛri Kirisa wo pɛɛn pu na

18 Na nagoo, koŋɔ ki taaxɔɔ l'a tɛɛɲɛ. Y'a yi logo na Kirisa wo Pɛɛn wu da ba ba. Wa nimɛ, Kirisa wo pɛɛn niɲɛhɛmɛɛ wa puyɛ shɛɛ na xɔ. Lee na w'à li cɛ na koŋɔ ki taaxɔɔ l'a tɛɛɲɛ.

19 Wɛɛ wo kariɲɛɛɛɛ ki ni p'a foro, ga pu bi ta pye ni wɛɛ ni nigin can can na wɛ. Pu da bi sii pye ni wɛɛ ni nigin, pu bi da gori wɛɛ ni. Ga pu voro w'a li shɛɛ na pee bye ni wɛɛ ni fungɔnnuyɔ na bada wɛ.

20 Ga yee wa ba pee ɲɛ wɛ, bani Fɛfɛɛɛɛ Munaa fanha ni yee ya sindirine ta, kɔnhɔ y'i can wu cɛ.

21 Nɛ ta sɛmɛ wu tun yi mu yi can cɛbaara na wɛ. Ga n'a wu tun yi mu bani y'a can cɛ, na nɔhɔ li cɛ sanha na kafineɛɛ ka shishiin ya foro can ni wɛ.

22 Jɔɔ wu ɲɛ kafinejo wɛ? Wemu w'a go na Yesu ɲɛ Kirisa wɛ, koŋɔ Shɔvɔɔ we-e ge, weefɔɔ wi. Weefɔɔ wu ɲɛ Kirisa wo Pɛɛn we. W'a zhege To Kile ni wu Ja wu ni.

23 Wemu w'a she Jafɔɔ wu ni ge, weefɔɔ ya she Tofɔɔ wu bɛ ni. Wemu w'a sɔɔ Jafɔɔ wu na ge, weefɔɔ ya sɔɔ Tofɔɔ wu bɛ na.

24 W'à yi kalaa jomɔ pemu ni fo yi n'a daa wu ɲɔkɔɔnrɔ ti ni ge, yi la le yiyɛ ni pee di gori yi funyɔ ni. Lee bu bye, yi bɛ na gori yaha Jafɔɔ we, ni Tofɔɔ wu wo kariɲɛɛge ki ni.

25 Kirisa ya ɲɔmɛɛ lɔ na wu na ba lekɛ kan wu mu ge, lee li wa ɲii sicuumɔ nixhɔbaama.

26 Pii p'a giin pii yi ɲuyɔ kyɛɛgi ge, pee wuu na n'a ye ka, na yi tun yi mu.

27 Yee kunni, Yesu ya Fɛfɛɛɛɛ Munaa kan yee mu, lee wa kori yee funyɔ ni, sipya wa shishiin kaɲɔɔ wa nige yi na na w'a yi kalaa wɛ. Fɛfɛɛɛɛ Munaa li wa yi kalaa keree bɛɛri ni, li kalaa wu wa can, kafineyɛ wa wu ni bada wɛ. Lee wuu na yi Fɛfɛɛɛɛ Munaa li wo kalaa wu co, y'i gori yaha Kirisa wo kariɲɛɛge ki ni.

28 Na nagoo, yi kori yaha Kirisa wo kariɲɛɛge ki ni, kɔnhɔ wu ba wuyɛ shɛ, wù lowagaa wuu di da, wù ganha da ba zhiige wu ɲaha tàan wu cabaɲa na wɛ.

29 Y'a li cɛ na Kirisa ya tii, lee wuu na w'à yaa na li cɛ na sipyaa sipya wa tiime keree pyi ge, Kile pya wu ɲɛ weefɔɔ.

3

Kile nagoo

1 Wèe kaa ya dan To Kile ni fo xuuni, fo w'a wèe pye wu nagoo. Can wu ɲɛ wii, wèe ya pye wu nagoo. Koɲɔ sipyii ya ta Kile cɛ wɛ, lee l'a pu pye pu ya cɛ nago Kile nagoo wèe ɲɛ wɛ.

2 Na taanɲii, nime wù ɲɛ Kile nagoo. Wù na ba bye lemu ge, lee wa sanha zhe wɛ. Ga w'à li cɛ na Yesu Kirisa ba wuyɛ shɛ, wù na ba bye ba wu ɲɛ wɛ, bani wù na ba wu kemɛ ɲa ba wu ɲɛ wɛ.

³ Kee tadaŋa ki wa sipya wemu beeri mu Yesu Kirisa na ge, weefɔɔ na wuyɛ pye feɛfeɛ ba Kirisa ɲɛ mɛ feɛfeɛ wɛ.

⁴ Sipyaa sipya w'a jurumu pyi ge, Kile wo saliya wu m'a gyɛɛgi. Bani na jurumu pye, lee kɔri ɲɛ Kile wo saliya wu m'a kyɛɛgi.

⁵ Y'a li cɛ na Yesu ya pa wu ba jurumu laha sipyii na. Jurumu wa shishiin bye wu na wɛ.

⁶ Sipyaa sipya w'a kori yaha wu kariɲɛɛɛ ki ni ge, weefɔɔ ya gbara wu kori yaha jurumu ni wɛ. Ga wemu w'a kori yaha na jurumu pyi ge, weefɔɔ ya wu ɲa wɛ, ali wu ya wu cɛ bɛ wɛ.

⁷ Na nɔhɔpiire, wa shishiin ganha bu yi piinne wɛ. We w'a tiime keree pyi ge, weefɔɔ nidiige ki wa, ma na jo ba Yesu Kirisa yɛ pyaa ya tii tiigana lemu na wɛ.

⁸ Wemu bu gori yaha na jurumu pyi, Shitaanni ni weefɔɔ ya foro, bani Shitaanni w'a jurumu pyi na lɔ fo taashiine li ni. Lee wuu na Kile Ja w'a pa, kɔnhɔ wu Shitaanni wo kapyegee ki kyɛɛgi.

⁹ Sipyaa sipya wu ɲɛ Kile wo pya wa ge, wee ya gbara wu kori yaha jurumu ni wɛ, bani Kile wo seɛɛɛ ti ma bye wu ni. Lee wuu na wu da já gori yaha jurumu ni wɛ, bani Kile wo pya wu ɲɛ wii.

¹⁰ Le na Kile nagoo ni Shitaanni nagoo ya jeni na wo puyɛ ni: Wemu ya tiime keree pyi wɛ, wee ya foro Kile ni wɛ, wemu bɛ ceboro kaa ya taan wu mu wɛ, wee bɛ wɛ.

W'à yaa na taan ni wùyɛ ni

¹¹ Jomɔ pe y'a logo fo taashiine li ni ge, pee pu wa pe: W'à yaa na taan ni wùyɛ ni.

12 Wù ganha bu bye Kayen shi wε, Shitaanni ni wee ya foro, w'a wu cuun gbo. Naha na w'a wu gbo wε? Bani wuyε pyaa kapyegee ki bi kolo, na ta cuunvɔɔ wu wo kapyegee di bi tii.

13 Na cebooloo, koŋɔ sipyii bu yi kɔ, lee ganha bu yi fo wε.

14 W'à li cε na w'à foro xu ni na jé ɲii sicuumɔ ni, bani wù cebooloo pu kaa ya dan wù ni. Wemu wu ɲε wu cebooloo kaa ya dan wu ni-i ge, wee ya kori yaha xu ni.

15 Sipyaa sipyaa w'a wu ceboro kɔ ge, wee ɲε sipyii gbovɔɔ. Y'a li cε na ɲii sicuumɔ nixhɔbaama wa goroo sipyii gbovɔɔ wa shishiin funɲɔ ni bada wε.

16 Le na w'à taanɲεεε ceni, bani Yesu Kirisa ya wu munaa kan, kɔnhɔ wu wèe ɲuɲɔ wolo. Wèe bε ya yaa na wù munahaa kan wù cebooloo wuu na.

17 Ke koŋɔ ke naafuu ɲε wemu mu ge, weefɔɔ bu wu ceboro funmɔ wo ɲa, na bye wu ya ɲuɲɔ ɲaari wu na wε, dii Kile tanɲεεε di da já bye weefɔɔ funɲɔ ni wε?

18 Na nɔhɔpiire, wù taanɲεεε ganha da bye ɲɔsεekpɔnyɔ, ni ɲɔtanga jomɔ yε wε, ga wù kapyegee k'a yaa na li shεε na can wu ɲε wù taanɲεεε ke.

Wù wù logoo waha, wù fulo Kile na

19 Wù ba lee pyi, lee na wù da ba li cε na wù ɲε can wu wuu. Wù na já wù hakilee pu tenε Kile ɲaha tãan.

20 Ali wù zɔlɔɔ pu ɲεhe ba wù jaagi bε, wù na já wù hakilee pu tenε, bani Kile ya keree bεeri cε, wu d'a pεle bε wèe zɔlɔɔ pu na.

21 Na taan̄nii, wèe zɔɔ pu bu bye pu ya já wèe jaagi nige wε, lee ya li shεε na wèe ya lowagaa ta, na fulo Kile na.

22 Wù bu yaaga bεeri jεeri wu mu, wù na kee ta, bani w'à wu jɔmεε conì, na wu jidaan keree pyi.

23 Wu jɔmεεjuu li le, na wèe pu dà wu Ja Yesu Kirisa mεge ki na, wù daan ni wùye ni, ba w'a yi jo wù mu wε.

24 Wemu w'a wu jɔmεε conì ge, weefɔɔ ya jé Kile wo karijεεge ki ni, a Kile bε di bye ni weefɔɔ ni karijεεge ni. Kile ya wu Munaa li kan wèe mu, lee na wèe ya li cε na Kile jε ni wèe ni karijεεge ni.

4

Kile Munaa ni kafinejo munaa

1 Ayiwa, na taan̄niinεε yi ganha ba daa munahaa bεeri kafila na wε, ga yi fεnhε ki suguri ki bi foro Kile ni, bani kafinejuu piimu p'a puyε pyi Kile tudunmɔɔ ge, pee nijehεmεε ya foro koŋɔ na.

2 Le na yi da ba Kile Munaa cε: Munaa lemu l'a sɔɔ li na na sipya ye pyaa Yesu Kirisa ya pa bye ge, lee l'a foro Kile ni.

3 Ga munaa lemu ya ta sɔɔ yee na Kirisa shizhaa na-ε ge, lee ya foro Kile ni wε, lee jε Yesu Kirisa wo Pεn wu wuu le. Y'a yi logo xɔ na wu na ba ba koŋɔ ke na. Ga nime, wuyε pyaa bε wa na xɔ koŋɔ ki na.

4 Na nɔhɔpiire, yee kunni jε Kile wuu, lee wuu na yee ya se ta pee kafinejuu pu na. Bani Kile Munaa le li wa yee funyɔ ni ge, lee ya ye koŋɔ sipyii pu wuu li na.

5 Pee kafinejuu pii jε ke koŋɔ ke wuu. Lee wuu na pu kafila wu naha ya tii ke koŋɔ ke yaŋmuyɔ ye

ye shizhaa na, a ke konɔ ke sipyii di ganha na pu jomɔ nuri.

⁶ Ga wèe kunni ne Kile wuu. Sipyaa sipya w'a Kile ce ge, weefɔɔ na da wèe jomɔ pu nuri. Ga sipya wemu ne Kile wo we, weefɔɔ ya wèe jomɔ pu nuri we. Ayiwa, lee na y'a da can Munaa li wo sipyii pu ce na shɔɔnri kafinejo munaa li wo sipyii pu ni.

Kile ya wu keree beeri pyi ni taanɛɛɛɛ ni

⁷ Ayiwa, na taanɛɛɛɛ, wù taan ni wùye ni, bani Kile ni taanɛɛɛɛ ya foro. See see taanɛɛɛɛ ne sipya wemu funɔ ni ge, wee wu ne Kile pya. Wee w'a Kile ce.

⁸ See see taanɛɛɛɛ ne sipya wemu funɔ ni we, wee ya Kile ce we, bani ma bu jo Kile, m'a jo taanɛɛɛɛ.

⁹ To Kile ya wu taanɛɛɛɛ ki she shegana lemu na ge, lee li wa me. W'a wu Ja nigin pe wu tun na pa konɔ na, kɔnhɔ wu ni sicuumɔ kan wèe mu.

¹⁰ Lemu l'a Kile wo taanɛɛɛɛ ki shee wù na ge, lee li wa me: Li wa nago wèe yiri taanɛɛɛɛ k'a fenhe yiri na naha tii Kile na-ε de! Ga wèe p'a fenhe taan Kile mu, a wu wu Ja nigin pe wu kan na pye saraga, kɔnhɔ wù jurumu wu yafa wù mu wee gbɔɔɔ ni.

¹¹ Ayiwa, na taanɛɛɛɛ, ba ni wèe kaa ya taan fo xuuni Kile mu lee taangana li na, wèe be ya yaa na taan ni wùye ni de!

¹² Sipya wa shishiin sanha Kile na we. Ga taanɛɛɛɛ bu bye wèe te ni, wèe ni Kile na bye kariɛɛɛɛ ni. Wu taanɛɛɛɛ ki be na ganha na bele wù funyɔ ni, fo na ba wù zɔɔɔ pu ni.

13 To Kile ya wu Munaa li kan wèe mu, lee na wèe ya li ce na jo wèe wa ni wu ni kariɲeege ni, wu be di je ni wu ni kariɲeege ni.

14 Wèeye pyaa ya wu ja jii na, lee funɲo ni, na yi yu be na Kile ya wu Ja wu tun na pa koɲo na, kɔnhɔ wu ba koɲo sipyii shɔ.

15 Sipyaa sipya w'a sɔɔ li na na Kile Ja wu je Yesu ge, Kile na gori yaha ni weefɔɔ ni kariɲeege ni, weefɔɔ be na gori yaha ni Kile ni kariɲeege ni.

16 Wèe kaa ya dan Kile ni taangana lemu na ge, wèe ya lee ce, na dà be li na.

Bani ma bu jo Kile, m'a jo taanɲeege. Wemu w'a kori yaha taanɲeege na ge, wee w'a kori yaha ni Kile ni kariɲeege ni, a Kile be di gori yaha ni weefɔɔ ni kariɲeege ni.

17 Kile wo taanɲeege ki ba bele wu funyɔ ni, fo na ba wu zɔlɔ pu ji, wee tuun wu ni caɲa kemu Kile da ba kiiri wu kɔn ge, fyaara ta shishiin da ba bye wu ni kee caɲa we. Bani ba Yesu Kirisa je we, mu wèe be wo jaarigana li wa koɲo puga ni.

18 Taanɲeege je sipya wemu zɔ ni ge, weefɔɔ ya fyagi we. See see taanɲeege ya fyaara beeri kori, bani sipya ya kakuuyo yemu pyi ge, yee wo jaagi kanhama pu ma wu pye wu na fyagi. Lee wuu na, sipya wemu w'a fyagi ge, weefɔɔ zɔ wu beeri ya ji see see taanɲeege na we.

19 Wèe kaa l'a fenhe taan To Kile mu, lee wuu na wu kaa ya dan wèe be ni.

20 Wa bu jo na Kile kaa ya dan wee ni, na ta wu ceboro makɔɲo di je wu funɲo ni, weefɔɔ je kafinejo. Bani ma ceboro wemu mu ya jaa jiga beeri ge, wee kaa bye li ya dan mu ni we, Kile wemu

wu ƶe mu ya wee ƶaa-i ge, dii wee kaa di da já da dan ma ni wε?

²¹ Yesu Kirisa yε pyaa bε yεε ya le ƶomεε le jo wèe mu na sipyaa sipya w'a jo na Kile kaa ya dan ma ni ge, ma cebooloo pu bε kaa ya yaa na dan ma ni.

5

Sipyaa ya yaa na sɔɔ Kile wo nijoyo yi na

¹ Sipyaa sipya w'a dà li na na Shɔvɔɔ wu ƶe Yesu ge, weefɔɔ ƶe Kile wo pya. Tofɔɔ kaa ba dan ma ni, wu nagoo bε kaa ya yaa na dan ma ni.

² To Kile kaa ba dan wèe ni, a wù ganha na wu ƶomεεjogoo ki bε conì, lee na wèe da li cε na wu nagoo pu kaa ya dan wèe ni.

³ Wù bu jo na Kile ya dan wù ni, w'à yaa na wu ƶomεhεε ki conì. Wu ƶomεhεε ki ya yaa ki pye wù mu tuguro wε.

⁴ Bani piimu bεeri pu ƶe Kile wo nagoo pu ge, pee bεeri ya se ta ke koƶo ke na. N'a daa wemu wu wa wèe mu ge, wee w'a wèe pye wèe ya já na se taa ke koƶo ke na.

⁵ Sipyaa sipya w'a dà li na na Kile Ja wu ƶe Yesu ge, ni wee wa yε bε wε, jɔgɔ wu da já se ta ke koƶo ke na wε?

⁶ Yesu Kirisa ya pa koƶo na lɔhɔ ni shishan baraga ni. Wu ya ta da lɔhɔ wo batizeli wu yε na-ε dε! Ga, w'a wu shishan bε kan p'a wo, na xhu. Kile Munaa li wa lee wo sεeri, bani lee l'a can wu shεε sipyii pu na.

⁷ Lee funƶo ni, sεεrεε taanri wu ƶe wà na li shεε sipyii pu na na Kile Ja wu ƶe Yesu.

⁸ Pee seereεε taanri wu ƚε: Kile Munaa ya can wu shεε; lɔhɔ ni shishan, yee bε di wu shεε. Ayiwa, yee taanri we ya bε ƚɔmεε na Yesu shizhaa na.

⁹ Sipyii ya yemu yu ge, wèe ya sɔɔ yee na, na ta yemu Kile ya yu ge, yee d'a ye na kanha sipyii wo nijoyo yi na. Kile ye pyaa k'a fiin jo wu Ja wu shizhaa na.

¹⁰ Sipyaa bεeri w'a dà Kile Ja wu na ge, weefɔɔ ya sɔɔ li na wu funɔɔ ni na kii keree kii ƚε can. Sipyaa wemu ya dà Kile wo nijoyo yi na wε, weefɔɔ ya Kile yaha ba kafinejo ƚε wε. Bani wufɔɔ ya ta dà Kile wo nijoyo yi na wu Ja wu shizhaa na wε.

¹¹ Yemu Kile ya jo wèe mu ge, yee yi wa mε na Kile ya ƚii sicuumɔ nixhɔbaama kan wèe mu. Pee ƚii sicuumɔ pe ya daa wu Ja wu gbɔɔɔ ni.

¹² Ayiwa, wee Ja wu ƚε sipya wemu mu ge, ƚii sicuumɔ pu wa weefɔɔ mu. Kile Ja wu ƚε wemu mu wε, ƚii sicuumɔ ƚε weefɔɔ mu bada wε.

Tadaja kemu ki wa n'a daa fεε pu mu ge

¹³ Ayiwa, yee piimu p'a dà Kile Ja wu na ge, nε we se mε we tun yi mu, kɔnhɔ y'i li cε na yee ya ƚii sicuumɔ nixhɔbaama pu ta na xɔ.

¹⁴ Ayiwa, lowaa lemu wa wèe mu Kile ƚaha tɔan ge, lee li wa le: Wèe bu yaaga ka ƚεeri wu mu na saha ni wu ƚidaan ni, wu na wèe ƚεεge ki logo.

¹⁵ Wù bi ta w'à li cε na w'a wù ƚεεge nuri, wèe ya li cε na yaaga bεeri wèe ya ƚεeri wu mu ge, wèe ya kee ta xɔ.

¹⁶ Jurumu wemu wu ƚε wu da já sipya munaa kyεεgi ƚiga na-ε ge, ma ceboro bu wee jurumu wa pye, Kile ƚεeri wu mu kɔnhɔ Kile di ƚii sicuumɔ kan wu mu. Piimu wo jurumu wu ƚε wu da já

pu munahaa kyεεgi niga na-ε ge, pee ye kaa di wa byi. Ga jurumu wa nε wà wemu na já sipya munaa kyεεgi niga na ge, di wa go yi Kile nεeri wee wa wuu na wε.

¹⁷ Tiibaara bεeri ti nε jurumu, can wu nε wii. Ga jurumu wa nε wà wee wa da já sipya munaa kyεεgi niga na wε.

¹⁸ Wèe ya li cε na jo sipya bεeri wu nε Kile wo pya wa ge, weefɔɔ ya goroo gbee jurumu na na byi wε. Bani Kile Ja wu ma wufɔɔ mara, lee wuu na Shitaanni da já se ta wu na wε.

¹⁹ Wèe ya li cε na jo wèe nε Kile wo nagoo, ga koŋɔ ke sipyii di nε Shitaanni wo fanha ke nɔhɔ ni.

²⁰ Ga wèe ya li cε bε na jo Kile Ja w'a pa, na ba fungɔngɔ fεεε kan wèe mu, kɔnhɔ wèe di see see Kile wuyε pyaa tii cε. Wèe na nε Kile Ja wu kari nεεge ki ni, lee ya wèe pye see see Kile wuyε pyaa wuu. Wee Ja we wu nε see see Kile wuyε pyaa, ni n̄i sicuumɔ nixhɔbaama.

²¹ Ayiwa na nɔhɔpiire, y'a yiyε kaseri yapεεgaanra na!

KARINĒĒGE NŌMĒE NIVONŌ
New Testament and Shorter Old Testament in
Senoufo, Mamara

copyright © 2014 Wycliffe Bible Translators, Inc.

Language: Mamara Sėnoufo (Sėnoufo, Mamara)

Translation by: Wycliffe Bible Translators

Contributor: Wycliffe Bible Translators, Inc.

© 2014-08-10, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files dated 29 Jan 2022

85728ed7-78f8-58e8-8967-0e976c0c2423